

**Uunga siunnersuut: Aalisarneq pillugu Inatsisartut inatsisaata allanngortinneqarnera pillugu Inatsisartut inatsisaat**

(Naalakkersuisunut ilaasortaq Ane Hansen, Inuit Ataqatigiit)

**Saqqummiussissut**

(Aalisarnermut, Piniarnermut Nunalerinermullu Naalakkersuisoq)

**Aappassaaneerpeqarnera**

Siunnersuutip siullermeerneqarnerani Naalakkersuisut sinnerlugit nalunaarutigaa; ”Aalisarneq pillugu inatsimmi atuuttumi §§ 2, 14, 25 aamma 29-imi allanngortinneqarnissaat pillugu siunnersuummi siunertaq sutigut tamatigut nunatsinni aalisarnermi piujuaannartitsinissamik Naalakkersuisut kissaatigisaannut naapertuuttusoq. Anguniagaq taanna piviusunngortissagaanni Kalaallit Nunaanni tamani aalisarnerup ingerlanneqarneranit paasisutissat tutsuiginartut eqqortuusullu katersorneqarnissaat pisariaqarpoq. Ilanngullugu siunertaavoq inatsisip siunertaata § 2-mi aalajangersarneqartup allanngortinneratigut tunitsivinni pisisartut arlaqaqisut aalisarnermik ingerlatsinerup pinngortitamut sunniutaasa akuerineqarsinnaasumiitinnissaannik kissaateqartut isiginarneqassasut.”

Aammattaaq atuisut akiliuteqartinneqarnerat pillugu aalajangersakkamik inatsisissatut siunnersuut imaqartoq, tassani pineqarpoq akiliuteqartitsinermi aamma akitsuusiinermi atuutilersinneqarneratigut aningaasartuutunik matussusiineq. Tassani siunertaavoq aalisarnermik inuussutisarsiorlut Kalaallit Nunaata aningaasartuutaasa ilaannik isumaginnittassasut. Atuisut akiliuteqartinneqartalerat nakkutilliinermut tunngassuteqartunut Namminersorlutik Oqartussat allaffissornikkut aningaasartuutaasa amerliartuinnarannut attuumatillugu isigineqassaaq.

Inatsisissamut siunnersuutip aappassaaneerpeqarnissaanut atatillugu nassuiaatitaanik Naalakkersuisut allannguiniarnerat marlunnik pingaarutilinnik pissuteqarpoq, taakkualu ataani erseqqissaaffigissavakka.

Umiatsiaararsorlutik aalisartut inatsisissamut siunnersuummut qisuariaataat tusaaniarsimavakka, isumaqarpungalu oqaaseqaatigisartagaasa aningaasanut inatsimmut siunnersuutip nassuiaataasa aammalu inatsisissamut siunnersuutip nassuiaataasa *erseqqissarneqarnerunissaat pisariaqartile-raat*. Aaqquissuussineq umiatsiaararsorlutik aalisartunut aningaasartuutunik ikittuunngitsunik nammakkiissaaq saarullinniarniarlutik, suluppaagarniarlutik, qeerarniarlutik, uugarniarlutik il.il. qinnuteqarnitik tamaasa 1.500 kr. akiliisariaqartassappata. Taamaattumik Naalakkersuisut pissutsit taamaattut tusaanngitsuusaarusunngilaat.

Aammattaaq Inatsisissatut siunnersuummut tunngatillugu siullermeerinninnermi oqaatigineqartut innersuussutigineqarput, atuisut akiliuteqartittalernissaannut tunngatillugu umiatsiaararsortut atugarisaat pingaarnerutillugu eqqartorneqartumut, inatsisartunut ilaasortat arlallit isumaqarmata umiatsiaararsortut pisariaqanngitsumik annertunerusunik nammakkersorneqarnissaat.

Naalakkersuisut inatsissatut siunnersuutip oqallisigineqarenerani oqaaseqaatigineqartut naapertorlugit inatsissatut siunnersuutip oqaaseqaatitaani allannguutissanik suliaqarpoq.

Avataasiortut eqqarsaatigalugit aalisakkanut tamanut qalerualinnullu pisassiissutit aamma sinerissap qanittuani raajartassanut pisassiissutit eqqarsaatigalugit allannguuteqanngillat. Tamatuma kingorna sinerissap qanittuani aalisariummut akuersissummut ataatsimut 1.500 kr.-inik akiliisoqartalissalluni, qaleralinniarnissamut, saattuarniarnissamut nipisanniarnermut aamma saarullinniarnissamut akuersissummik tunniussisoqartillugu. Qeerarniarnit, suluppaagarniarnit, nataarniarnit uugarniarnit tassunga ilanngunneqarput.

Sinerissap qanittuani umiatsiaararsorluni aalisarnermut tunngatillugu allannguutip kingunerisainik tamakkiisumik akuersissummut siunissami 1.500 kr.-inik akiliuteqartassapput. Tamakkiisumik akuersissut taanna atorlugu umiatsiaararsortut qaleralinniarsinnaatitaassapput, saattuarniarsinnaatitaassapput, nipisanniarsinnaatitaassapput, saarullinniarsinnaatitaassapput, qeerarniarsinnaatitaassapput, suluppaagarniarsinnaatitaassapput, nataarniarsinnaatitaassapput kiisalu uugarniarsinnaatitaassaallutik. Tassunga tunngatillugu ilisimatitsissutigineqassaaq atuisut akiliuteqartalernissaannut malittarisassat nalunaarutikkut erseqqinnerusut massakkut suliarineqaleruttormata.

Tamatumunnga atatillugu nalunaarutigineqarpoq, allannguutip kingunerissagaa akuersissutinut akiliutit 400.000,00 kr.-inik ikileriarni.

Naalackersuisoqarfiup ilutigalugu Inatsisartunut ilisimatitsissutigissavaa atuisut akiliuteqartalernissaat pillugu Naalackersuisoqarfiup KNAPK-llu akornanni 12. november 2009-mi ataatsimeeqqatigiittoqarmat. Tassunga tunngatillugu ilisimatitsissutigineqassaaq KNAPK ilaasortani sinnerlugit kissaatigimmagu atuisut akiliuteqartitalernissaata allannguutissamik siunnersuuteqarnikkut aatsaat 1. april 2010-mi atuutilersinneqarnissaa. Ilutigalugu KNAPK-p nalunaarutigaa kattuffiup atuisut akiliuteqartalernissaat tunngaviumik tapersorsorlugu.

Taassuma kingorna Naalackersuisut KNAPK-p allagai marluk pissarsiarai partiinut, ataatsimiititaliami siulittaasumut Naalackersuisunullu nassiunneqarsimasut. Allakkami siullermi 9. november 2009 ullulernerqarsimasumi KNAPK nalunaarpoq kattuffiup tunngaviumik atuisut akiliuteqartarnerat tapersorsorlugu. Allakkap aappaani 13. november ullulernerqarsimasumi KNAPK siunnersuuteqarpoq akiliuteqarnissap annertussusai appartinneqassasut. Tamarmik tusaatissatut tiguneqarput.

Taamatut oqaaseqarlunga suliaq Inatsisartuni aappassaaneerlugu suliarineqarnissaa tunniuppara.